



# Declaration du Roy,

sur la prise des armes par aucuns  
de ses sujets de la Religion pre-  
tendue reformee: Portant nou-  
uelle confirmation des Edicts  
& Declarations cy deuant fai-  
ctes en faueur de ceux de ladite  
Religion.

*Avec l' Arrest de la Cour de Parlement.*



A PARIS,

Par FED. MOREL, & P. METTAYER,  
Imprimeurs ordinaires du Roy.

M. DC. XV.

*Avec privilege du Roy.*

THE NEWBERRY  
LIBRARY

Case


F

39

.326

1615

fsu



O V I S par la grace de  
 Dieu Roy de France  
 & de Nauarre, à tous  
 ceux qui ces presentes  
 lettres verront, Salut.  
 Les Declaratiōs faictes  
 & reiterees par nous,  
 depuis nostre aduenemēt à la Courōne,  
 pour confirmer les Edicts, Declarations,  
 Breuets, Arrests, & Reglemens faicts en  
 faueur de nos sujets de la Religion pre-  
 tenduē reformee, durāt le regne du feu  
 Roy Henry le grand, nostre tres-honoré  
 Seigneur & Pere, que Dieu absolue, ont  
 assez faict cognoistre, que nostre inten-  
 tiō & vouloir a tousiours esté de les faire  
 garder inuiolablement, comme loix ne-  
 cessaires, pour maintenir tous nos sujets  
 en paix & amitié, les vns avec les autres,  
 & en obeïssance & deuoir enuers nous.  
 Ce qu'ayant esté bien & sagement con-  
 sideré par la Reyne, nostre tres-honoree  
 Dame & Mere, elle auroit durant sa re-  
 gence pris vn grand soin de les faire ob-

seruer, & de pouruoir à ce que les cōtra-  
uentiōs fussent reparees au mesme tēps  
qu'elle en receuoit les plaintes ; nous  
auons aussi depuis nostre maiorité suyui  
le mesme cōseil, & adiousté à son exēple  
de nouvelles gratificatiōs & bien-faiçts,  
dissimulé mesme bien souuēt des excez  
& violences commises par aucun d'eux,  
qui meritoient grande & seure puni-  
tion, en intention de les asseurer tous-  
iours de la continuation de nostre bien-  
vueillance & faueur, & par ce moyen les  
rendre plus enclins & affectionnez à se  
maintenir en leur deuoir. A quoy s'ils  
eussent voulu ioindre la souuenance des  
bons & fauorables traitemēs, qu'ils ont  
receu du feu Roy nostre tres-honoré  
Seigneur & Pere, à la memoire duquel  
ils doiuent l'affermissement de leur li-  
berté, & de l'exercice de leur religion  
dont ils ioüissēt en toute seureté, ils eus-  
sent par vne gratitude louable, & le de-  
uoir d'une entiere obeissance & fidelité  
reconnu enuers nous toutes ces obliga-  
tions; lors mesme que l'innocence & foi-  
blesse de nostre bas aage a deu exciter la  
vertu, le courage, & la fidelité de tous



nos bõs sujets, pour desfẽdre & cõseruer l'autoritẽ, que Dieu nous a donnee : de laquelle seule depend la seureté publique, & le salut particulier d'un chacun. Ceste conduite neantmoins, quoy que pleine de bonté & douceur, n'a pas profité enuers tous, plusieurs s'estãs esleuez en armes contre nous, pour fauoriser le mouuement, cõmencé par nostre Cousin le Prince de Condé. Entre lesquels les vns se seruent de la Religion, cõme d'un pretexte specieux, pour couvrir & cacher leur ambition, & furieux desir de s'accroistre dans les desordres & ruines de l'estat; les autres ont esté trompez & seduits par de faulses impressions, & vaines craintes, que ces premiers leur ont donné, qu'ils estoient en danger de souffrir persecution, s'ils ne prenoient promptemẽt les armes avec eux, pour s'en garantir, faisant accroire, pour mieux surprendre leur simplicité, qu'avec les mariages d'Espagne, articles secrets auoient esté accordez, & coniuration faicte de les chasser du Royaume, ou exterminer du tout. Ce qu'ayant esté creu trop legement par eux, ils se sont precipitez en

cette entreprise, estimans y estre contraincts, pour leur iuste & necessaire defense : qui rend leur faute excusable, & plustost digne de commiseration, que de peine. Mais ils ne fussent tombez en cet inconuenient, s'ils eussent mieux considéré que ce mensonge impudent & malicieux estoit sans apparence de verité; n'y ayant personne si priuee de sens & de iugement, qui puisse croire, les alliances ayant esté recherchees par voyes d'honneur, d'une part & d'autre, ainsi qu'il est accoustumé entre grands Princes, on ayt desiré & requis de nous, des conditions, qui ne pouuoient estre accomplies, sans mettre le feu & le sang dās le Royaume, & y faire des deserts & solitudes; comme il fut adueni sans doute, en rompant les Edicts de Pacification, & faisant vn si rude & iniuste traitement à nos sujets de ladite Religion, que ceux-cy publient par vn mensonge controuué artificiellement, & à tres-mauuais dessein. Car rien n'a esté fait en secret, en la poursuite & resolution de ces alliances, tout y a esté public, veu communiqué, conclu & arresté avecq̃ feu nostre Cousin le Cōte de

Soiffons, Prince sage, d'aage meur, & de grande experience: avec nostre Cousin le Prince de Condé, & les autres Princes, Seigneurs, Officiers de la Courône, & plus notables personnes de nostre Conseil, qui estoient lors pres de nous. Entre lesquels nostre Cousin le Marechal de Bouillon s'y est aussi tousiours trouué, ayant tous ensemble d'vn mesme aduis approuué ces alliances, sans qu'vn seul d'eux y ait contredit, combien qu'il leur fust libre (l'affaire estant entiere, & au commencement de sa deliberation) de sentir & dire ce que chacun d'eux estimoit en sa conscience estre plus vtile pour le bien du Royaume, soit en les conseillant, ou les dissuadant, sans crainte de nous offenser, ou d'encourir nostre mauuaise grace: d'autant qu'il n'y auoit aucun preiugé en l'esprit de la Royne lors regente, ny au nostre, mais seulement vn desir d'estre esclarcis de ce qui nous seroit plus expediét de faire en vne deliberation de si grâde importance. Tous les Souuerains, qui pensent auoir interest à conseruer ce Royaume en son ancienne reputation,

grandeur & dignité, ayant aussi reconnu  
 ces alliances n'auoir esté faictes à mau-  
 uais dessein, n'en ont pris aucun soup-  
 çon, ny defiance, apres auoir esté bien  
 informez, que nostre intention estoit de  
 les faire seruir tant qu'il nous seroit pos-  
 sible, à la manutentiō de la paix par tou-  
 te la Chrestienté, non d'aucune entre-  
 prise & inuasion sur les païs & estats de  
 quelques Princes & Souuerains que ce  
 soit, & moins encores pour interrompre  
 & troubler la paix & le repos, dont tous  
 nos subjects iouissoient si heureusement  
 auant que ce mouuement fut commē-  
 cé. Et neantmoins ceux de ladite Reli-  
 gion pretendue reformee qui ont prins  
 les armes, ne laissent de dire & publier  
 tousiours qu'il y a secrette intelligence  
 entre France & Espagne, pour entre-  
 prendre leur ruyne, voulans faire acroi-  
 re à tous nos sujets; que nous sommes si  
 peu confiderez de vouloir consentir &  
 approuuer, que la France serue de thea-  
 tre pour y iouër ceste sanglante trage-  
 die, qui deura decider par les armes les  
 differens qui sont en la Religion, enco-  
 re que nous soyons du tout esloignés de



ce conseil, & que nous estimions au cō-  
 traire le iugement de cette querelle de-  
 uoir estre delaiissé à Dieu seul, qui sçau-  
 ra bien vser quand il sera temps, pour sa  
 gloire & nostre salut, des remedes pro-  
 pres & conuenables pour estre serui &  
 adoré par tous les Chrestiens selon la  
 pureté de sa doctrine, & en la vraye E-  
 glise, que nous croyons estre la Catholi-  
 que, Apostolique & Romaine, de la-  
 quelle nous faisons profession, & en la-  
 quelle (moyennant sa grace) nous vou-  
 lons viure & mourir. Mais ces artifices  
 inuentéz pour deguiser & couvrir leur  
 rebellion, n'ont pas trompé & seduit les  
 plus sages, & les gēs de bien, qui ne font  
 profession de la mesme religion que par  
 conscience, & comme pensant y trou-  
 uer leur salut, non par faction : lesquels,  
 en grand nombre, tant Seigneurs, Gen-  
 tils-hommes, villes, cōmunautéz, qu'au-  
 tres particuliers de toutes qualitez, blas-  
 ment & detestent la malice & temerité  
 de leur entreprise, & ont déclaré publi-  
 quement, tant de bouche que par escrit,  
 qu'elle doit estre tenue pour vne pure  
 & vraye rebellion, non pour querelle de  
 reli-



religiō, Nous ayāt à cette occasiō offert  
 cōme bons, vrais & loyaux sujets, tout  
 seruice de leurs biens & de leurs vies cō-  
 tre eux, s'ils ne veulent retourner à resi-  
 piscence. A quoy ils les exhortēt tous les  
 iours, & y adiouliēt les menasses de prē-  
 dre les armes avec nous, pour ayder à  
 leur ruine, pourueu qu'il nous plaise les  
 faire iouir du benefice des Edicts, & pri-  
 uer seulement de cette grace, ceux qui  
 s'en sont rendus indignes. Mais ces re-  
 monstrances & menaces n'ont de rien  
 seruy enuers eux, non plus que celles des  
 habitans de la plus part des villes & pla-  
 ces qui leur ont esté laissées en garde,  
 qui en ont faict autant, & protesté aussi  
 publiquement de ne vouloir adherer à  
 leur rebellion. Car au lieu de se retirer  
 de leur mauuais dessein, ils ont dit info-  
 lemment, que ceux de leur religion qui  
 ne les ont voulu suivre iusques icy, serōt  
 en fin cōtraints de le faire; crainte qu'en  
 les laissant perdre & souffrant leur ruine,  
 ils ne s'affoiblissent & mettent en dāger  
 eux mesmes. Conditō & seruitude qui  
 seroit trop miserable & dangereuse pour  
 les gens de bien, s'ils estoient forcez de

faire mal contre leur volonté, leur conscience & deuoir, pour plaire à ceux qui n'ont pour but, que leur ambition & interest particulier. Nous espérons mieux toutesfois de leur vertu & fidelité, & qu'ils demeureront si fermes & constâs en l'affection qu'ils doiuent à nostre seruice, que leur résistance & la continuation de leur loyauté, aurôt assez de force pour contraindre les autres à se desister de leur entreprise, quoy que pour la iustifier & fortifier, ils supposent des resolutions & decrets d'assemblees generales, qui ne furent oncques; mais bien quelques conuenticules & assemblees illicites d'aucuns particuliers choisis & apostez par eux, lesquels sans charge ny pouuoir, & bien souuent contre la volonté & declaration expresse contenue aux procurations & mandemens de ceux qui les ont deputez, adherent aux propositions de ces factieux, qui pretendent s'en seruir au dōmage & grand preiudice des plus gēs de bien de leur religion. N'estât dōc nostre intentiō d'imputer à tous la faute de quelques particuliers, Nous de l'aduis de la Reyne nostre tres-honoree

Dame & mere, des Princes, Seigneurs, Officiers de la Couronne, & autres personnes notables de nostre Conseil estés pres nous, & de nostre pleine puissance & autorité Royale, auons dict, déclaré, & ordonné; disons, declarons, & ordonnons, voulons, & nous plaist, conformément à ce que nous auons desia cy-deuant & par plusieurs fois ordonné, que l'Edict de Nâtes verifié en tous nos Parlemens, faict en faueur de nos subjects de la Religion pretenduë reformee, par le feu Roy nostre treshonnoré Seigneur & pere, Ensemble les autres articles, declarations, reglemens faicts & Arrests donnez sur l'interpretation, ou execution, & en consequence d'iceluy Edict, par luy & durant son regne, ou par nous depuis son decez, soient entretenus & inuiolablement gardez & obseruez, ainsi qu'il a esté faict, & ordonné iusques à present. Et si en quelques endroicts du Royaume il y a eu des contrauentions, qu'elles soient entierement reparees, en sorte qu'il n'y ayt rien à desirer de nostre part. Voulons en outre, en consideration & faueur de la



fidelité qui nous a esté gardee par vn  
 nombre infiny de nos bons sujets de  
 ladicte Religion, entre lesquels il y en a  
 des principaux & de plus grande quali-  
 té, qui meritent bien vn singulier tes-  
 moignage de nostre bienveillance, que  
 les offenses qui nous ont esté faictes par  
 ceux de la mesme Religion qui ont pris  
 les armes contre nous, ou qui les ont as-  
 sistez & fauorisez en quelque façon que  
 ce soit, iouyssent pareillement du bene-  
 fice de nos Edicts, & soient rendus par-  
 ticipans de ceste grace, tout ainsi que  
 s'ils estoient demeurez en leur deuoir:  
 Pourueu que dans vn mois apres la pu-  
 blication qui sera faicte de ces presen-  
 tes en chacun de nos Parlemens, ils de-  
 clarent au Greffe du Baillage & Senef-  
 chaussee, au ressort de laquelle ils ont  
 leur demeureance, qu'ils se desbistent &  
 departent du tout de ladicte entreprise,  
 pour nous rendre fidellement le seruice  
 qu'ils doivent, sans plus adherer, assi-  
 ster, ou fauoriser en quelque façon que  
 ce soit, ceux, qui voudront persister en  
 leur rebellion; Et qu'ils remettent aussi  
 les places par eux occupees au mesme

estat qu'elles fouloient estre auant ce  
mouuement. Ce qu'ayant faict, & n'y  
contreuenans apres, Nous les auons  
prins & mis, prenons & mettons en no-  
stre protection: & faisons inhibitions &  
defenses à tous nos sujets de quelque  
qualité qu'ils soient, de leur mesdire, ny  
mesfaire, de faict, ou de parolles, à l'oc-  
casion des choses passees, Et à nos Pro-  
cureurs generaux d'en faire aucunes  
poursuittes contr'eux, Voulás que tout  
le passé soit oublié & aboly, cōme nous  
l'abolissons par cefdites presentes. Mais  
si apres ledit temps d'un mois expiré, ils  
continuent encor en leur premiere re-  
bellion, soit en portant les armes, ou as-  
sistant & fauorisant en quelque manie-  
re que ce soit, ceux qui les auront prises,  
Nous voulons qu'ils soient poursuiuis  
& punis comme criminels de leze-Ma-  
jesté, & perturbateurs du repos public;  
Et que les villes & communautéz qui y  
adhereront, soient aussi descheuës de  
toutes graces immunitéz, & priuileges,  
dont ils auoient iouy en vertu des con-  
cessions à eux faictes par les Roys nos  
predecesseurs, ou par nous, comme s'en

estans rendus indignes, Ce que nous enjoignons à nos Procureurs generaux, & leurs substituts, de faire en route diligence, Et à nos Parlemens de proceder contr'eux, avec le mesme soin & affection: Comme aussi à nos Gouverneurs & Lieutenans generaux de prester la main forte à l'execution des Arrests & Jugemens qui seront donnez contr'eux, sans souffrir qu'ils iouyissent aucunement de la grace & liberte qui leur a esté accordée par les Edicts faicts en faueur de nos sujets de ladicte Religion, dont ils se seront rendus indignes, par ceste malicieuse perseuerance en leur rebellion. SI DONNONS en mandement à nos amez & feaux les Gens tenans nos Cours de Parlement, Chambres de l'Edict, Baillifs, Seneschaux, ou leurs Lieutenans, & tous autres nos Iusticiers & Officiers qu'il appartiendra, chacun endroict soy, que ces presentes nos lettres de Declaration, ils facent lire, publier, & enregistrer, & le contenu en icelles garder, entretenir, observer, & executer de point en point, selon leur forme & teneur, sans permettre ny



souffrir qu'il y soit aucunement contre-  
 uenu. Enioignons en outre à nosdicts  
 Procureurs generaux, & leurs substituts,  
 y tenir la main de leur part, & satisfaire  
 à ce qui dependra du deuoir de leurs charges  
 pour l'effect de nostre volonte & intention  
 cy dessus mentionnee. Car tel est nostre  
 plaisir. En tesmoing dequoy nous auons  
 faict mettre nostre seel à cesdictes presentes.  
 Donné à Bourdeaux le dixiesme iour de  
 Nouembre, l'an de grace mil six cens quin-  
 ze, Et de nostre regne le sixiesme.

Ainsi signé,      LOVYS.

Et plus bas,

Par le Roy,

DE LOMENIE.

Et seellée sur double queuë du grand  
 seau en cire iaune.

Leuës, publiees & registrees, oy & ce requerrant le Procureur general du Roy. Ordonne que coppies seront enuoyees aux Bailliages & Seneschauſſees pour y estre leuës, publiees & registrees à la diligence des Substituts du Procureur general du Roy, ausquels enioinct certifier la Cour de leurs diligences au mois, à peine d'en respondre en leurs noms. A Paris en Parlement le sepriesme Decembre 1615.

Signé, DV TILLET.









